

Erthygl 11 – Trefniadau ar y Cyd

11.01 Trefniadau i hyrwyddo lles

Gall y Cyngor neu'r Bwrdd Gweithredol, er mwyn hyrwyddo lles economaidd, cymdeithasol neu amgylcheddol ei ardal :

- (a) lunio trefniadau neu gytundebau gydag unrhyw berson neu unrhyw gorff;
- (b) cydweithredu â, neu hwyluso neu gydlynu gweithgareddau unrhyw berson neu unrhyw gorff; ac
- (c) ymarfer ar ran y person neu'r corff hwnnw unrhyw rai o swyddogaethau'r person neu'r corff hwnnw.

11.02 TREFNIADAU AR Y CYD

- (a) Gall y Cyngor sefydlu trefniadau ar y cyd gydag un neu fwy o Awdurdodau Lleol a/neu eu gweithrediaethau i gyflawni swyddogaethau nad ydynt yn swyddogaethau gweithredol mewn unrhyw un o'r Awdurdodau cyfranogol, neu gynghori'r Cyngor. Gall trefniadau o'r fath olygu penodi pwyllgor ar y cyd â'r Awdurdodau Lleol eraill hyn.
- (b) Gall y Bwrdd Gweithredol sefydlu trefniadau ar y cyd gydag un neu fwy o Awdurdodau Lleol i gyflawni swyddogaethau sy'n swyddogaethau gweithredol. Gall trefniadau o'r fath olygu penodi pwyllgorau ar y cyd â'r Awdurdodau eraill hyn.
- (c) Ac eithrio fel y nodir isod, gall y Bwrdd Gweithredol benodi aelodau o'r Bwrdd Gweithredol yn unig i bwyllgor ar y cyd, ac nid oes raid i'r aelodau hynny adlewyrchu cyfansoddiad gwleidyddol yr Awdurdod Lleol fel corff cyfan.
- (d) Gall y Bwrdd Gweithredol benodi aelodau i bwyllgor ar y cyd o'r tu allan i'r weithrediaeth lle bo gan y pwyllgor ar y cyd swyddogaethau mewn rhan o ardal yr Awdurdod yn unig, a bod yr ardal honno yn llai na dwy ran o bump o'r Awdurdod yn ôl arwynebedd neu boblogaeth. Mewn achosion o'r fath, gall y weithrediaeth benodi i'r pwyllgor ar y cyd unrhyw gynghorydd sy'n aelod dros etholaeth a gynhwysir yn gyfan gwbl neu'n rhannol o fewn yr ardal. Nid yw'r gofynion ynghylch cydbwysedd gwleidyddol yn berthnasol i benodiadau o'r fath.

Gwelir manylion unrhyw drefniadau ar y cyd gan gynnwys unrhyw ddirprwyo i bwyllgorau ar y cyd yng nghynllun y Cyngor ar ddirprwyo yn Rhan 3 o'r Cyfansoddiad hwn.

11.03 Mynediad at Wybodaeth

- (a) Mae'r Rheolau Mynediad at Wybodaeth yn Rhan 4 o'r Cyfansoddiad hwn yn gymwys.
- (b) Os yw holl aelodau pwyllgor ar y cyd yn aelodau o'r Weithrediaeth ym mhob un o'r Awdurdodau cyfranogol, yna mae ei drefn mynediad at wybodaeth yr un fath â'r hyn sy'n gymwys i'r Weithrediaeth.
- (c) Os yw'r pwyllgor ar y cyd yn cynnwys aelodau nad ydynt ar Weithrediaeth unrhyw Awdurdod cyfranogol, yna bydd y rheolau mynediad at wybodaeth yn Rhan VA o Ddeddf Llywodraeth Leol 1972 yn gymwys.

11.04 Dirprwyo i ac o Awdurdodau Lleol eraill

- (a) Gall y Cyngor ddirprwyo swyddogaethau anweithredol i Awdurdod Lleol arall neu, mewn rhai amgylchiadau, i weithrediaeth Awdurdod Lleol arall.
- (b) Gall y weithrediaeth ddirprwyo swyddogaethau gweithredol i Awdurdod Lleol arall neu i weithrediaeth Awdurdod Lleol arall mewn rhai amgylchiadau.
- (c) Bydd y penderfyniad p'un ai derbyn dirprwyo o'r fath o Awdurdod Lleol arall yn cael ei gyfyngu i gyfarfod y Cyngor.

11.05 Contractio allan.

Gall y Cyngor a'r Bwrdd Gweithredol gontractio allan i gorff neu sefydliad arall swyddogaethau y gellir eu cyflawni gan swyddog ac sy'n ddarostyngedig i orchymyn o dan adran 70 o Ddeddf Dadreoleiddio a Chontractio Allan 1994, neu o dan drefniadau contractio lle bo'r contractwr yn gweithredu fel asiant y Cyngor o dan egwyddorion contractio arferol, cyn belled nad oes unrhyw ddirprwyo ar wneud penderfyniadau dewisol y Cyngor.